

JAMHUURIYADDA
SOMALILAND



REPUBLIC OF
SOMALILAND

XAFIISKA GARYAQAANKA GUUD EE QARANKA
SOLICITOR GENERAL OFFICE

FAAFINTA RASMIGA AH OFFICIAL GAZETTE

النشرة الرسمية لجمهورية صومالييلاند

Samadka 10aad

Cadad Gaar ah

06/02/2021

**WAX-KA-BEDDELKA IYO KAABISTA XEERKA
LA'DAGAALANKA MAAN-DOORIYAHA,
XEER LR.21/2021**

Email: garyaqaankaguud@gmail.com
Web: www.garyaqaankaguud.com

*Lama iibin karo
Not for sale*

Sannadka 2021



Xafiiska Madaxweynaha

Sum: JSL/XM/WM/222-623/012021

Taar: 18/01/2021

Wareegto Madaxweyne

Dhaqan-galka Wax-ka-beddelka iyo Kaabista Xeerka La'dagaalanka Maan-dooriyaha, Xeer Lr. 21/2021

Markaan Arkay: Qodobka 90aad ee Dastuurka
Jamhuuriyadda Somaliland;

Markaan Arkay: Qodobada 75aad ee Datuurka
Jamhuuriyadda Somaliland;

Markaan Arkay: Go'aanka Golaha Wakiillada Go'aan
Lr.GW/KF-44/876/2021, eek u
taariikheysan 04/01/2021, ee ay ku
ansixiyeen Wax-ka-beddelka iyo
Kaabista Xeerka La'dagaalanka
Maan-dooriyaha, xeer Lr. 21/2021;

Waxaan soo-saaray;

Dhaqan-galka Wax-ka-beddelka iyo Kaabista Xeerka
La'dagaalanka Maan-dooriyaha, xeer Lr. 21/2021.

Allaa Mahad Leh

Muuse Biixi Cabdi
Madaxweynaha Jamhuuriyadda Somaliland



Ujeedo: Go'aanka Ansixinta Wax ka badelka iyo Kaabista Xeerka La-dagaallanka Maan-doriyaha Xeer Lr. 21/2021

GOLAHA WAKIILADU

- Markuu Arkay:-** Qodobbada 5aad, 16aad(4)aad iyo 128aad(1)aad ee Dastuurka oo ku saabsan in Shareecada Islaamku saldhig u tahay Xeerarka & Shuruucda JSL lagaga dhaqmayo, wixii ka soo horjeedaana yahay waxba kama jiraan.
- Markuu Arkay:-** In maan-dooriyuhu halis wayn ku yahay amniga dalka, sidoo kalana saamayn taban ku leeyahay koboca dhaqaalaha, akhlaaqiyaadka iyo dhaqanka suuban ee bulshada.
- Markuu Aqoonsaday:-** In maan-dooriyuhu si baaxad leh u soo galo dalka sidoo kalana isticmaalkiisu uu aad ugu sii fidayo qaybaha bulshada gaar ahaan da'yarta, kaasi oo keeni kara dhibaatooyin isugu jira amniga, dhaqaalaha iyo akhlaaqda bulshadaba.
- Markay U Caddaatay** In xeerka hadda jira aanu dhigayn ciqaab ku filan in lagu xakameeyo soo galinta iyo ka ganacsiga maan-dooriyaha, sidaa daraaddeed loo baahan yahay in ciqaab culus oo ku filan la saaro dadka ku kaca soo galinta, isticmaalka iyo ka ganacasiga maan-dooriyaha.
- Markuu Arkay:-** Soo jeedinta Xukuumadda ee Wax ka badal iyo Kaabis in lagu sameeyo Xeerkaa la-dagaallanka Mukhadaraadka Xeer **Lr. 21/2001**
- Markuu u codeeyay:-** Ansixinta Xeerka Hay'adda Caymiska **Kal-fadhiga 44aad ee Fadhigiisi 24aad** taariikhduna ahayd **4/01/2021** oo ay goob joog ahaayeen **(43)** Mudane oo ka mida mudanayaasha Golaha Wakiilada.

WUXUU


Cod aqlabiyad ah **38 cod** oo gacan taag ah ku Ansixiyay **wax-ka-badelka iyo kaabista Xeerka la-dagaalanka maandooriyaha (Xeer Lr. 91/2021)**, halka diiday aanay jirin,afar (4) mudane-na ka aamuseen **Gudoomiyuhuna muu codayn** sida caadada ah.

ALLAA MAHAD LEH

C/risaaq Siciid Ayaanle
Xoghayaha Guud ee Golaha Wakiilada



Baashe Maxamed Faarax
Gudoomiyaha Golaha Wakiilada





GOLAHA WAKIILLADU

Markuu Arkay: - Qodobbada 5aad, 16aad(4)^{aad} iyo 128aad(1)^{aad} ee Dastuurka oo ku saabsan in Shareecada Islaamku saldhig u tahay Xeerarka & Shuruucda JSL lagaga dhaqmayo, wixii ka soo horjeedaana yahay waxba kama jiraan.

Markuu Arkay: - In maan-dooriyuhu halis wayn ku yahay amniga dalka, sidoo kalana saamayn taban ku leeyahay koboca dhaqaalaha, akhlaaqiyaadka iyo dhaqanka suuban ee bulshada.

Markuu Aqoonsaday: - In maan-dooriyuhu si baaxad leh u soo galo dalka sidoo kalana isticmaalkiisu uu aad ugu sii fidayo qaybaha bulshada gaar ahaan da'yarta, kaasi oo keeni kara dhibaatooyin isugu jira amniga, dhaqaalaha iyo akhlaaqda bulshadaba.

Markay Caddaatay **U** In xeerka hadda jira aanu dhigayn ciqaab ku filan in lagu xakameeyo soo galinta iyo ka ganacsiga maan-dooriyaha, sidaa daraaddeed loo baahan



yahay in ciqaab culus oo ku filan la saaro dadka ku kaca soo galinta, isticmaalka iyo ka ganacasiga maan-dooriyaha.

Markuu Arkay: -

Soo jeedinta Xukuumadda ee Wax ka badal iyo Kaabis in lagu sameeyo Xeerkaa la-dagaallanka Mukhadaraadka Xeer Lr. 21/2001

Wuxuu Ansixiyay

Wax ka badelka iyo Kaabista Xeerka La-dagaallanka Maan-doriyaha Xeer Lr. 21/2020



QODOBKA 1^{AAD} **MAGACA XEERKA**

Xeerkan waxa loogu yeedhayaa **Xeerka La-dagaallanka Maan-dooriyaha (Xeer Lr. 21/2020)**

QODOBKA 2^{AAD} **EREY-BIXINTA**

Maan-dooriye-

Waxaa loola jeedaa shay kasta oo isticmaalkiisu bedelo xiska aadamaha oo keeni kara sakhrad muddo dheer ama muddo gaaban sifa kasta ha lahaadee.

Caadayste: -

Waxaa loola jeedaa Qof kasta oo qabatimay isticmaalka maan-dooriye ee xeerkan lagu mamnuucay isticmaalkiisa iyo Ganacsigiisa ee ay Maxkamad horteed kaga cadaato hal mar iyo wax ka badan

Isticmaal Maan-dooriye: -

Waxaa loola jeedaa sifa kasta oo loo qaato maandooriye sida cabbid, qiijin, ursasho, turqin irbad, isku mudis, shidasho ama cunid, Nuugis, jiqis, buufin, iyo qaab kasta oo loo isticmaalo Maandooriye.

Gaadiid:-

Waxaa loola jeedaa wax kasta oo qaada Maandooriye sida gawaadhiga, diyaarada iyo Markab ama doon, Awr, Demeero, Fardo, iyo wax kasta



oo lagu qaado maan-dooriye

Maxakamadda: - Waxaa loola jeedaa Maxakamadda awooda u leh ka gaadhista go'aan faldanbiyeey dhacay oo uu jideeyay Xeerkani.

Jeedalid: - Waxa loola Jeedaa karbaash ciqaab ah oo shareecadda Islaamku banaysay.

Jeedal: - Waxa loola jeeda shayga ama aallada loo adeegsanayo karbaashka xadka shareecada Islaamku banaysay.

QODOBKA 3AAD
CIQAABTA KA DHALANAYSA ISTICMAALKA
MAAN-DOORIYE

- 1) Qofkii isticmaala maandooriye ee ay maxkamad horteed kaga caddaato waxa lagu ciqaabayaa karbaash dhan afartan (40) jeedal iyo ciqaab xadhig ah oo dhan **2 sano** ilaa **3 sanadood** oo xadhig aan iib lahayn ah.
- 2) Qofkasta oo ku isticmaala maan-dooriye meel fagaare ah, dadweynaha u furan, sakhrad ku muuja meel fagaare ah ama dadweynaha u furan oo ay maxkamad horteed kaga caddaato waxa lagu ciqaabayaa ciqaabta ku xusan faqradda laad ee qodobkan iyo ganaax dhan **5,000,000 Sl. Shillin ilaa 10,000,000 Sl.** Shillin oo hadduu bixin waayo loogu bedelayo xadhig u dhigma.



- 3) Qofku haddii uu yahay mid caadaystay isticmaalidda maan-dooriyaha waxa lagu ciqaabayaa karbaash dhan afartan (40) jeedal ama/iyo ciqaab xadhig ah oo dhan **3 sano ilaa 5 sanadood** oo xadhig aan iib lahayn.
- 4) Caadayste waxa loo aqoonsanayaa qof kasta oo ay maxkamad horteed kaga caddaatey isticmaal maan-dooriye laba jeer ugu yaraan iyo wixii ka badan.
- 5) Qofkasta oo siiya maan-dooriye qof da'diisu ka yar tahay 15 sano ama qof xiskiisu dhiman yahay oo ay maxkamad horteed kaga caddaato waxa lagu ciqaabayaa xadhig dhan **5 sanno ilaa 8 sanadood** oo aan iib lahayn.
- 6) Qofkasta oo u qariya qof kale shay maan-dooriye ah ama cunto ugu dara oo ay maxkamad horteed kaga caddaato waxa lagu ciqaabayaa ciqaabta ku xusan faqradda 4aad ee qodobkan.
- 7) Qofkasta oo ku khasba qof kale shay maan-dooriye ah oo ay maxkamad horteed kaga caddaato waxa lagu ciqaabayaa xadhig dhan **7 sanno ilaa 10 sanadood** oo aan iib lahayn.
- 8) Qofka daawo ahaan dakhtar la aqoonsan yahay u siiyo ama ugu mudo shay maan-dooriye xeerkani u aqoonsaday ciqaabaha Qodobkan laguma



xukumayo marka la cadeeyo in dakhtar la aqoonsanyahay dawo ahaan u siiyay.

QODOBKA 4^{AAD}
CIQAABTA KA GANACSIGA, SAMAYNTA,
HAYSASHADA, BEERISTA SOO GALINTA MAAN-
DOORIYE

- 1) Qofkasta oo dalka soo galiya, beera, sameeya, ka ganacsada ama si uun u haysta maan-dooriye uu ka ganacsanayo oo ay maxkamad horteed kaga caddaato waxa lagu ciqaabayaa xadhig dhan **5 Sanno ilaa 15 sannadood** oo aan iib lahayn.
- 2) Maxkamaddu waxay amraysaa in la baabiiyo ama la gubo dhamaan maan-dooriyihii la qabtay, kii la beeray, qalabkii lagu beeray ama lagu sameeyay.
- 3) Wadaha gaadiidka dalka soo galiya maan-dooriye nooc kasta oo uu yahay (mid dhul, cir iyo bad) ee ay Maxkamad horteed kaga caddaato waxa lagu ciqaabayaa ciqaabta ku xusand faqradda 1^{aad} ee Qodobkan.
- 4) Gaadiidka lagu qabtay maan-dooriye ee ay Maxkamad horteed kaga caaddaatay waxa marka koowaad lagu ciqaabayaa ganaax lacageed oo dhan **20% Qiimaha gaadiidka**, Marka labaad waxa la ganaaxayaa **50% qiimaha gaadiidka** marka saddexaad waa lala wareegayaa.
- 5) Qofka Mas'uulka ah degan guriga (dhismaha) lagu iibiyo maan-dooriye ee ay maxkamad horteed kaga caddaato waxa lagu ciqaabayaa ciqaabta ku xusan faqradda 1aad ee Qodobkan iyadoo digniin



qoraal ahna la siinayo marka koowaad mulkiilaha guriga, marka labaad ee lagu helo waxa mulkiilaha guriga lagu ganaaxayaa **2% qiimaha guriga**, marka saddexaad ee lagu helo waxa lagu ganaaxayaa **5% qiimaha guriga**, marka afraad ee lagu helo waa lagala wareegayaa dhismaha.

- 6) Qofkasta oo kale oo degan guriga oo ka qayb qaata qarinta, qaybinta iyo libinta maan-dooriyaha waxa lagu ciqaabayaa 3 ilaa 5 Sanno.

QODOBKA 5^{AAD}
GACANSIINTA IYO KA QAYB QAADASHADA SOO
GALINTA MAAN-DOORIYE

Qofkasta oo ka gacansiiya, jidmariya, qariya ama si uun uga qayb qaata soo galinta maan-dooriye oo ay maxkamad horteed kaga caddaato waxa uu mutaysanayaa ciqaab xadhig ah oo dhan (5-10 sannadood) oo aan iib lahayn.

QODOBKA 6^{AAD}
BEDELAAD IYO LAALID

Xeerkani wuxuu bedelayaa qodobbada 411, 412, 413, 414, 415, 416, 417, 342 iyo 343 ee Xeerka Ciqaabta Guud, waxa kale oo uu laalayaa Xeerkani, Xeer kasta oo ka soo horjeeda.

QODOBKA 7^{AAD}
DHAQAN-GALKA

Xeerkani wuxuu dhaqan-gelayaa Marka Labada Gole ee Baarlamaanka (Golaha Guurtida iyo Golaha Wakiilladu) Ansixiyaan, Madaxweynaha



Jamhuuriyadda Somalilandna saxeexo, faalinta
rasmiga ahna lagu soo saaro.

C/risaaq Siciid Ayaanle
Xoghayaha Guud ee Golaha Wakiilada JSL

Baashe Maxamed Faarax
Gudoomiyaha Golaha Wakiilada JSL
